

26 DEC 2000

Mahathir-MAS

MAS: KERAJAAN MAHU LIHAT SYARAT YANG DIKENAKAN SYARIKAT ASING

PUTRAJAYA, 27 Dis (Bernama) -- Kerajaan perlu melihat syarat-syarat yang dikenakan pembeli-pembeli luar negeri jika mereka menawarkan untuk membeli saham dalam Penerbangan Malaysia, kata Perdana Menteri Datuk Seri Dr Mahathir Mohamad hari ini.

"Kita perlu lihat syarat-syarat yang mereka (rakan luar) desak jika mereka beli saham MAS," katanya kepada pemberita selepas menerima beribu-ribu pengunjung ke rumah terbuka Hari Raya di Seri Perdana di sini.

Dr Mahathir berkata, MAS mempunyai obligasi sosial dan itu merupakan salah satu sebab mengapa penerbangan nasional itu menghadapi kesukaran mendapat untung.

"Tetapi jika kepentingan luar negeri masuk, mereka akan mendesak supaya obligasi sosial tidak menjadi sebahagian daripada tugas MAS. Jadi, kita perlu menimbangkan apa yang akan terjadi jika kita berbuat begitu," katanya.

Dr Mahathir juga berkata, kerajaan tidak akan membiarkan MAS dikuasai syarikat-syarikat asing walaupun kerajaan membenarkan mereka mempunyai pegangan dalam syarikat penerbangan nasional itu.

"Tetapi jika mereka pemegang saham minoriti sekalipun, mereka (pembeli asing) akan tetap mendesak agar beberapa syarat dipenuhi," kata perdana menteri.

Dr Mahathir juga berkata, jangkaan pertumbuhan ekonomi negara sebanyak tujuh peratus untuk tahun depan berdasarkan pertumbuhan ekonomi tahun ini.

"Kita perlu ingat bahawa ia berdasarkan pertumbuhan tahun ini dan pertumbuhan tahun ini agak tinggi," katanya.

Jadi untuk tahun 2001, pertumbuhan tujuh peratus akan menjadi pertumbuhan yang agak tinggi, kata Dr Mahathir.

"Kita selalu bersikap konservatif. Sebagai contohnya tahun ini, kita meramalkan 5.1 peratus, kemudian disemak kepada 5.8 peratus dan kita sebenarnya akan mencapai lebih tinggi lagi. Tetapi kerajaan Malaysia tidak mempunyai tabiat membuat ramalan liar," tambah Dr Mahathir.

Pelbagai ramalan lain telah meletakkan pertumbuhan Keluaran Dalam Negara Kasar tahun ini sekitar 7.5 peratus.

-- BERNAMA

RV ES AR